



**Suliffeerunnermi ikiorsiissutinik ullut 14-kkaarlugit tunniunneqartartunik pisartagaqartut, ulluni suliffiusuni tulleriinni marlunni pisartakkaminnik ilanngaanneqartarunnaarnissaat siunertaralugu, Naalackersuisut Ukiakkut Ataatsimiinnermi 2017-imi, Suliffeerunnermi ikiorsiissutit pillugit inatsisartut inatsisaannut nr. 2, 15. maj 2014-imeersumut, allannguutissamik siunnersuuteqaqquneqarnissaannik aalajangiiffigisassatut siunnersuut.**  
(Inatsisartunut ilaasortaq Agathe Fontain, Inuit Ataqatigiit)

Suliffeerunnermi ikiorsiissutit ullumikkut atuuttut annertuumik iluarsagassanngorsimapput, illoqarfinni nunaqarfinnilu angalatilluta naammattuugassaasuaannarput inuit sulerusukkaluarlutik suliffeqanngikkallarnermi ikiorsiissutit tapiissutillu tunniunneqartartunut sanilliullugit sulilernerminni akiligassatigut ajornartorsiuteqalersarnertik pissutigalugu suliffeerutiinnarnissartik qinertaraat, amerlanerit ingerlaannaq tapinik annaasaqartaramik taamaasillutillu inuuniarnerminni inuussutissaminnut inuuttuulersarlutik ingammilu meeraqarsimagaangamik inuuniarnerminni suliffeqalernissamut ikaarsaartarneq ajornartorsiorfigisarpaat.

Taamaammat suliffeerunnerup nalaani ikiorsiissutaasartut pillugit aaqqissuusseqqittoqartariaqarpoq, Inatsiartunilu ilaasortap Agathe Fontain-ip siunnersuutaa ajornartorsiummiit alloriaqqinnissamut aqutissanut ilaavoq.

Inuit Ataqatigiit isumaqarpugut suliffeerunnermi ikiorsiissutit suliffeqalernissamut kajumilersitsisumik ikaarsaarnermi aaqqissuusisoqartariaqartoq. Ullumikkut suliffissaaleqisoqaraluartoq illoqarfinni nunaqarfinnilu sulisussanik amigaateqalersarpugut ingammik illoqarfinni nunaqarfinnilu aalisakkanik suliffissuaqarfiusuni. Suliffeqarfippassuit aamma misigisarpaat sulisussanik amigaateqarnerminni suliffeqanngitsunik pisinnaasaqarluartunik sulisussarsinnaagaluarlutik suliffeqannginnermiit suliffeqalernermut ikaarsaarnermi aningaasatigut ajornartorsiuulersarneq pissutigalugu sulisorinnaasaraluartik annaasarlugit. Taamaammat isigisagut tamakkua iluarsiniarlugit sulilluta aallartittariaqarpugut.

Ukiuni kingullerni innuttaasut akornanni naligiinnginneq annertusiartorpoq, pissakinnerit suli pissakinneruleriartorput pisuullu pisuunngoraluttuinnarlutik, taamaakkaluartoq Naalackersuisoqatigiit piffissami kingullermi oqaatigisarpaat aaqqissuusseqqinnermi pissaqarnerit aallerfigineqarnissaat orniginartinneqanngitsoq, tamatuma apererusulersippaatigut aaqqissuusseqqinnermi innuttaasut atugaannik naligiinnerulersitsiniarneq qanoq ililluni aningaasalersorniarnersoq.

Aningaasaq pisissutaasinnaasoq ukiuni kingullerni nalikilliarporpoq, ilaatigut akitsuutinik atuutilersinneqartartuni pissakinnerit eqqornerlunneqarnerusaramik pisiniarfinni akit akitsoraluttuinnarneranik kinguneqartarmat. Sulisartut ullut 14-nikkaarlugit aningaasarsisartut suliffeerukkallarnermilu ikiorsiissutinik ullut 14-nikkaarlugit ikiorsiissutinik tiguisartut inigisamut akiliinissamut inuuttoortarput, inigisamut akiliisarnerit ullut 14-nikkaarlugit ingerlanneqarsinnaaneq ajormata.

Orsussap akia qaffakkaangat inigisamut tapiissutit appartartuusisarput kiassarnermut tapiisoqarneq ajormat. Tamatumalu kinguneri ullumikkut ersarinneruleriartorput, ilaqutariit inigisaminniit anisitaasartut amerliartormata, tamannalu ilaqutariit meerallit eqqarsaatigalugit atugarliornermik, meeqqanillu sumiginnaanermik kinguneqalersarput, tassuunalu pisortat aningaasartuutissaqarnerulersarput suliassaqarnerulersaramik.

Pissakinnerit pisuullu akornanni ikeq annertusiartortoq suliassaavoq annertoq, iluarsaaqqinnermik annertuumik malitseqartinneqartariaqartoq. Tamanna iliuseqarfiginiarlugu Naalackersuisuusarsimasut iliuseqarsimapput ilaatigut Atugarissaarneq akilerartarnerlu pillugit annertuumik misissuititsisoqarsimalluni. Inuit Ataqatigiinnilu inassutigerusupparput misissuititsisimaneq annertoq taanna sakkussatut atorluaqqullugu, aqqissuusseqqinnermi pissakinnerit pisuullu akornanni assigiinnginnerujussuaq nalimmassarniarlugu sakkussanik tungavilersorluakkanik pitsaalluinnartunik ulikkaarmat.

Taamatut oqaaseqarluta Inatsisartuni ilaasortap Agathe Fontain-ip siunnersuutaa ilalerparput, aappasaaneerneqartinnanilu Inatsiartut Ilaqutariinnermut ataatsimiisitaliani suliareqqitassanngortillugu.